

南投詩鈔

七古

忘憂森林

自來仙源隱南投，佳妙不讓九寨溝；一瞥忘憂心澹慮，何勞苦上仲宣樓。
激灑一泓春水滿，疏林倒映鏡不流；向與人煙交通絕，絕代佳人空谷幽。
嵐翠迷遮佳人面，空濛爛靜掩嬌羞；森林野徑尋逸跡，山水幽夢事清遊。
飄然豈類人間地，應有仙客駐丹丘；若教庾郎睹斯境，不賦當年蕭瑟愁。

埔里紹興酒

埔里芳醪出紹興，揭甕香飄動山城；愛蘭清冽尤添作（注），不惟酒泉古享名。
問渠佳味應何似，鍾靈毓秀釀春成；一斗已銷俗慮淨，三杯堪傳詩膽生。
月下最宜邀太白，籬邊須合招淵明；小酌浮生能得意，淺斟濁世更忘爭。
且入愁腸澆壘塊，猶可暫傾心不平；放眼紅塵多醉客，吾輩獨醒亦何情。

***愛蘭清泉：位在埔里鎮西側愛蘭台地下有甘醇地下泉水，埔里著名的紹興酒就是取自愛蘭台地泉水所釀造，因此又有天下第一釀酒泉稱號。**

七律

風櫃斗詠白梅

九重天女下瑤台，淡襲羽衣霜雪裁；玉骨疑從姑射得，冰心定自廣寒來。
已看銀浪飄仙袂，曾服金丹脫俗胎；應愛此鄉山水窟，甘為幽素一枝梅。

溪頭竹林

溪頭篁竹自成林，不學李桃原有陰；抱節堅持君子志，懷虛深蘊古人心。
千竿玉色蛟龍舞，萬葉風聲鸞鳳吟；截作笙簫猶悵憾，徽之逝後少知音（注）。

***即王徽之，王羲之之子。性愛竹，曾說：“何可一日無此君！”**

竹山茶園觀採茶

花巾箬笠踏山岡，錦簇丘陵多女郎；芽嫩翠攀雲嶺色，日炎紅曝雪膚光。
往來須惜叢間影，採擷堪憐袖底香；徒摘好茶無識味，朝朝辛苦為誰忙。

信義鄉食梅子餐

嘉果高華入饌新，熟成顆玉碧含春；沁心酸韻偏消暑，凝齒幽情更出塵。
秀色席間山況味，清芬筵下月精神；未沾城市膏粱氣，要使人寰品絕倫。

遊鹿谷藍腹鵲生態觀察區詠藍腹鵲

踏芳青嶺舞春輝，取樣藍天織錦衣；羽濯碧溪清自照，影棲蒼石靜相依。
林間隱士難群宿，雲外仙蹤只獨歸；尤愛故鄉泉壑好，高情宜伴鳳凰飛。

集集蕉田

舞盡東風碧色新，栽成集集萬株珍；芳心嫩捲雲間月，寬葉長舒嶺上春。
但使騷人詩綠蠟，休教甘味染紅塵；幽姿獨不宜何事，雨下瀟瀟倍愴神。

松木町妖怪村

枕流漱石宿山雲，魑魅妖精此聚群；福地徜徉心曠逸，洞天修煉意殷勤。
戕人幽怪何從見，肇亂奸凶不絕聞；安得清風長在手，為君一舉淨埃氛。

品鹿谷貴妃茶

紫筍龍團未足珍，勝如妃子荔枝新；煙揚欲繞煙霞夢，杯洗堪除市井塵。
花乳細烹爐底火，茗湯甘潤舌前春；茶仙若使能嘗此，寧謫長為鹿谷人。

七絕

溪頭空中走廊

不與巴川棧道殊，雲梯送我上清都；登臨莫訝觀瞻險，心境悠然即坦途。

詠日月潭

無必人工多鑿雕，天然風韻自嬌嬈；西湖已擬如西子，日月雙潭若二喬。

愛蘭清泉

幽如蘭芷出天姿，空谷佳人本絕奇；流向俗塵終不染，長教清似在山時。

奧萬大賞楓

坐賞千山萬樹楓，誰將旖旎舞春風；可憐樊素櫻唇色，未抵深秋一葉紅。

竹山瑞龍瀑布

瀑流噴濺玉珠聲，原是祥龍鱗甲成；問爾何朝騰霧去，得為時雨濟蒼生。

*** 舊名山坪頂瀑布，取名為瑞龍的原因是蔣經國先生曾於巡視此地時，看瀑布形狀有如飛龍，而特別命名為「瑞龍瀑布」。**